

仁

獄

類

編

仁獄類編卷之十八

新安余懋學行之父篡

從弟懋禮立之父閱

甥韓起龍校梓

果斷凡一十二則

夫蓄二三之見者滋羣猾之奸持不斷之謀者敗已成之事是故腹蛇在螫則斷臂弗恤載璧遇蛟則負劍不顧此無他不以私愛留後害小不忍而亂大謀也往冊所載誅姦猾于頃刻決

嫌疑於一言。獄無不決之疑。法有必行之厲。此其人雖未能一一合于中道。然于大易不留之義。亦庶乎爲近之矣。爰彙果斷。

孟椒盟臧孫

魯臧孫紇被攻。斬鹿門之關。以爲奔邾。自邾如防。使請立後。旣立。臧爲紇乃致防。而奔齊。其人曰。其盟我。臧孫曰。無辭。將盟季孫。召外史掌惡臣而問盟首焉。對曰。盟東門氏也。曰。母或如東門。遂不聽。公命殺適立庶。盟叔孫氏也。曰。母或如叔孫。僑如。

欲廢國常。蕩覆公室。季孫曰。臧孫之罪。皆不及此。
孟椒曰。盍以其犯門斬關。季孫用之。乃盟曰。無或
如臧孫。紇干國之紀。犯門斬關。臧孫聞之曰。國有
人焉。誰居。其孟椒乎。按臧紇之罪。夫子有要辭矣。雖曰不要。君吾不信也。以此爲盟。臧氏必當心服。

烹阿封卽墨

齊威王初卽位。不治。委政卿大夫。九年之間。諸侯
並伐。國人不治。於是威王召卽墨大夫而語之曰。
自子之居卽墨也。毀言日至。然吾使人視卽墨田。

野闢民人給官無留事東方以寧是子不事吾左右以求譽也封之萬家召阿大夫語之曰自子之守阿譽言日聞然吾使人視阿田野不闢民人貧苦日趙攻鄆子不能救衛取薛陵子弗知是子厚幣事吾左右以求譽也是日烹阿大夫及左右嘗譽者皆并烹之於是齊國震懼人人不敢飾非務盡其誠齊國大治

終軍詰徐偃

漢元鼎中博士徐偃使行風俗偃矯制使膠東魯

國鼓鑄鹽鐵還奏事。徙爲太常丞。御史大夫張湯劾偃矯制。大害法至死。偃以爲春秋之義。大夫有可以安社稷存萬民者。顓之可也。湯以致其法。不能誣其義。武帝詔終軍問狀。軍詰偃曰。古者諸侯國異俗。分百里不通。時有聘會之事。安危之勢。呼吸成變。故有不受辭造命。顓已之宜。今天下爲一萬里同風。故春秋王者無外。偃巡封域之中。稱以出疆何也。且鹽鐵郡有餘藏。二國鼓鑄不足以爲利害。而以安社稷存萬民爲辭何也。又詰偃膠東。

南近瑯琊北接北海魯國西枕泰山東有東海受其鹽鐵偃度田郡口數田地率其用器食鹽不足以并給二郡邪將執宜有餘而吏不能也何以言之偃矯制而鼓鑄者欲及春耕種贍民器也今魯國之鼓當先具其備至秋乃能舉火此言與實反者非偃已前之奏無從不惟所爲不許而直矯作威福以從民望干名采譽此明聖所必誅也枉尺直尋孟子稱其不可今所犯罪重所就者小偃自予必死而爲之邪將幸誅不加欲以采名也偃窮

誣服罪當死軍奏偃矯制顯行非奉使命請下御史大夫徵偃卽罪奏可上善其詰有詔示御史大夫

不疑叱收縛

漢始元中有一男子乘黃犢車建黃旒衣黃襜褕著黃帽詣北闕自謂衛太子公車以聞詔使公卿將軍中二千石雜識視長安中吏民聚觀者數萬右將軍勒兵闕下以備非常丞相御史中二千石至者立莫敢發言京兆尹雋不疑後到叱吏收縛

或曰是非未可知且安之不疑曰諸君何患於衛太子昔蒯瞶違命出奔輒拒而不納春秋是之衛太子得罪先帝亡不卽死果來自詣此罪人也遂送詔獄天子與大將軍霍光聞而嘉之曰公卿大臣當用有經術明於大誼者不疑由是名聲重於朝廷後廷尉驗治何人竟得姦詐本夏陽人姓成名方遂居湖以卜筮爲事有故太子舍人嘗從方遂卜謂曰子狀貌甚似衛太子方遂心利其言幾得以富貴卽詐自稱詣闕逮召鄰里識知者張宗

祿等方遂坐誣罔不道要斬。一云姓張名延年。

何武斷遺劍

漢沛郡有富家翁。年老且病。有貲二十餘萬。生男纔三歲。失母。又無親屬。有一女適人。甚不賢。翁恐女爭其財產。兒必不全。因喚族人爲遺書。悉以財產屬女。但遺一劍云。兒年十五。可以此付之。其後女將劍。亦不與兒。兒詣郡陳訴。時何武爲太守。得其辭。因錄女及壻省其手書。顧謂掾吏曰。此人因女性強梁。壻復貪鄙。恐賊害其兒。又計小兒正得。

此財亦必不能全獲。名雖付女。寔寄之耳。夫劒者斷也。限年十五。智力亦足以自居。度此女壻必不復還。其劒當明州縣得以伸理。若凡庸何能用慮宏遠如是哉。悉奪取財物以與兒。曰。敝女惡壻。溫飽十年亦已幸矣。於是論者悅服。

鍾離奪常田

漢鍾離意爲會稽北部督郵。有烏程男子孫常。常弟竝。分居各得田十頃。竝死。歲饑。常稍稍以米粟給竝妻子。輒追計值作券。復取其田。竝兒長大。訟

常掾史議曰。竝孫兒遭饑。賴常升合。長大成人。而更訟常。非順孫也。意獨曰。常身爲父遺。常撫孤弱。是人道正義。而稍稍以升合。參取其田。懷挾奸路。貪利忘義。竝妻子雖以田與常。困迫之至。非私家也。請奪常田畀竝妻子。衆議爲允。

李昉折隋資

唐李昉。武后時。爲肅機時。宇文化及子。訴訟先蔭。昉方食。未卽判化及子遽曰。肅機而未食。庸知天下有冤而求食乎。昉怒。取牒署曰。父弑隋主。子訴。

隋資可乎人服其敏

程廻辯沒貲

宋程廻爲泰任尉訓武郎揚大烈有田十頃死而妻女存俄有訟其妻非正室者官沒其貲且追十年所入租部使者以委廻廻曰大烈死貲產可歸其女女死當歸所生母可也

王衣詰范瓊

宋王衣歷大理少卿時范瓊有罪下大理寺衣奉詔鞠之瓊不服衣責以靖康圍城中逼遷上皇擅

殺吳革迎立張邦昌事瓊稱死罪衣顧吏曰囚服矣。

婁機斷索價

宋婁機孝宗時知西安縣巨室買地爲塋城發地遇石復索元價機曰設得金將誰歸

李先奪寺田

宋李先爲淮南轉運使壽春民陳氏施僧田其後貧弱往丐食僧所而僧逐之取僧園中筍遂執以爲盜先詰其由卽斷奪田之半以還之

天爵証血衣

元蘇天爵擢江南行臺御史沅陵民文甲無子育其甥雷乙後乃生兩子而出乙乙俟兩子行賣茶卽舟中取斧並斫殺之沉斧水中而血漬其衣蹟故在事覺乙具服部使者乃以三年之疑獄釋之爵曰此事二年半耳且不殺人何以衣汚血又何以知斧在水中又其居去殺人處甚近何謂疑獄遂寘於理

仁獄類編卷之十八終

仁猷類編卷之十九

新安余懋學行之父纂

男 昌祚續輯

甥韓起龍校梓

不私

凡八則

夫法不可以徇私私也亦不可以不私私也以
徇私私者徇私之心爲私固私也以不私私者
徇不私之心爲私亦私也孔子之告葉公曰父
爲子隱子爲父隱直在其中矣此天理人情之

至雖私也而不害其不私也。知此義則臯陶執之固法也。舜竊負而逃亦法也。法行自近固法也。議親議貴議故亦法也。要以法行而不傷恩。恩全而不害法。斯謂仁之至。義之盡。古聖人制刑之中固如此爾。不然而賊恩以明法。法則得矣。如恩何。又不然不忍以法傷恩而輒以身殉法。法則得矣。如身何。此異端刻核之術。君子所不道。然其志亦可矜也。爰彙不私。

過殺伏劒死

李離爲晉文公司理過聽殺人自拘當死文公曰
官有貴賤罰有輕重下吏有過非子之罪也離曰
臣居官爲長不與史讓位受祿爲多不與下分利
今過聽殺人傳其罪下吏非所聞也辭不受令文
公曰子則自以爲有罪寡人亦有邪離曰理有法
失刑則刑失死則死公以臣能聽微決疑故使爲
理今過聽殺人罪當死遂不受令伏劍而死按離
冀以悟居之慎刑耳
惜文公之不終悟也

子文刑族人

楚令尹子文之族有干法者。廷理聞其令尹之族也。釋之。子文召廷理而責之。遂致其族人於廷理。曰。不是刑也。吾將死。廷理懼。遂刑其族人。國人聞之。曰。若令尹之公也。吾黨何憂乎。乃與作歌曰。子文之族。犯國法。程廷理釋之。子文不聽恤。顧怨萌。方正公平。

縱父還自刎

石奢相楚。昭王道有殺人者。相追之。廼其父也。縱其父而還。自繫焉。使人言之。王曰。殺人者。臣之父。

也。夫以父立政，不孝也。廢法縱罪，不忠也。臣罪當死。王曰：追而不及，不當伏罪。子其治事矣。石奢曰：不私其父，非孝子也；不奉王法，非忠臣也。王赦其罪，上惠也；伏誅而死，臣職也。遂不受令，自刎而死。

法誅子殺人

墨者有鉅子腹綽，居秦。其子殺人，秦惠王曰：先生之年長矣，非有他子也。寡人已令吏弗誅矣，先生其以此聽寡人也。腹綽對曰：墨者之法曰：殺人者死，傷人者刑。此所以禁殺傷人也。夫禁殺傷人者

天下之大義也。王雖爲之賜，而令吏弗誅，腹錚不可不行墨者之法，不許惠王而遂殺之。

蘇章按故人

東漢蘇章爲冀州刺史，有故人爲清河太守，贓私狼籍。章始至，與飲，權甚，守喜曰：「人皆有一天，我獨有二天。」章曰：「今日蘇孺文與故人飲酒者，私恩也；明日冀州刺史按事者，公法也。」遂按正其罪，州境肅然。

苟晞不貸弟

晉荀晞都督青兗諸軍事其從母依之奉養甚厚其子求爲將不許曰吾不以王法貸人將無後悔邪固求之乃以爲督護後犯法晞杖節斬之從母叩頭救之不聽旣而素服哭之曰殺卿者兗州刺史哭弟者荀道將也

仁瑀戮兄子

宋馮仁瑀遷瀛州防禦使兄子嘗因醉誤殺平民繫獄當死民家自言非有宿憾但誤爾願以過失殺傷論仁瑀曰我爲長吏而兄子殺人此怙勢爾

非過失也豈敢以私親而亂國法哉卒論如律

虞信撲殺子

國朝虞信字尚忱沔陽人永樂中貢入胄監拜監察御史有直聲猶敦尚廉節取予之際一介不苟累官山東觀察使一屬吏餽其子金研受之置之案頭信忽見研訝曰適從何來爾父橐中無長物爾清白吏子胡爲金其研也亟述所自子跪以情告信怒曰墜我家聲者必癡兒也遂繫付獄吏以其事聞英宗命付信自治信竟撲殺此子

仁獄類編卷之二十

新安余懋學行之父纂

男 昌祚續輯

甥韓起龍校梓

徇曲 凡一十三

夫法不可以有徇也。徇之重則苛，苛則民殘。徇之輕則縱，縱則民幸。殘且幸，則民不畏法而畏吏。法斯弊矣。君陳之篇曰：予曰辟爾，惟勿辟。予曰宥爾，惟勿宥。夫君猶不可徇，況他人乎？輓近

世昧天齊之義。失制中之宜。徇權勢以爲上下。視喜怒以爲重輕。有深文而入之者矣。有巧合而出之者矣。有微偵而合之者矣。有豫飭而迎之者矣。有陽請而奉之者矣。有陰諷而阿之者矣。官反內貨。惟來之不同。其于以徇曲則一也。呂刑曰。今往何監。非時伯夷播刑之迪。其今爾何懲。惟時苗民罔察于獄之麗。若茲所述。固所謂罔察于獄之麗。而典獄者之所當懲者也。爰彙徇曲。

州黎上下手

楚穿封戌囚皇頡公子圍與之爭之正于伯州犁。伯州犁曰。請問于囚。乃立囚。伯州犁曰。所爭君子也。其何不知。上其手曰。夫子爲王子圍寡君之貴介弟也。下其手曰。此子爲穿封戌方城外之縣尹也。誰獲子。囚曰。頡遇王子弱焉。

溫舒事有勢

漢王溫舒爲人調善事有勢者。卽無勢者視之如奴。有勢家雖有姦如山弗犯。無勢者貴戚必侵辱。

舞文巧詆下下戶之滑以煮大豪其治中尉如此

張湯察上意

漢張湯爲廷尉。所治卽上意所欲罪。與監史深禍者。所出卽上意所欲釋。與監史輕平者。所治卽豪必深文。巧詆卽下戶羸弱。時口言雖文。致法上財。察於是。徃徃釋湯所言。

杜周善候伺

漢杜周爲廷尉。其治大放張湯。而善候伺。上所欲濟者。因而陷之。上所欲釋者。久繫待問。而微見其

冤狀客有讓周曰。君爲天子決平。不循三尺法。專以人主意指爲獄。獄者固如是乎。周曰。三尺安出哉。前王所是著爲律。後王所是疏爲令。當時爲是。何古之法乎。

仲卿深文致

隋趙仲卿仁壽中。檢校司農卿。蜀王秀之得罪。奉詔徃益州窮按之。秀賓客經過之處。仲卿必深文致法。州縣長吏坐者大半。上以爲能。賞奴婢五十口。黃金貳佰兩。米粟伍千石。

子絢狗后旨

唐來子絢。武后時擢左臺監察御史。語言直惡。后倚以按獄。多狗后旨。故賜姓武。字家臣。旣誣雅州刺史劉行實兄弟謀反。已誅掘夷先墓。得遷遊擊將軍。俄流死。

利貞希奸臣

唐周利貞者。亡其系。武三思亂禁中。五王謀誅之。私語崔湜。湜反以其計告三思。五王貶。湜勸速殺之。以絕人望。問誰可使。以利貞對。利貞湜內兄也。

表攝右臺侍御史。馳嶺外。矯殺敬暉。桓彥範。袁恕已。後敬讓以父寃。奏曰。周利貞。希奸臣意。枉殺先臣。暉。惟陛下正罰。以謝天下。乃貶利貞。邕州長史。未幾。賜死。

吉溫附林甫

唐吉溫。故酷吏子。性陰詭。諂附貴宦。若子姪事父兄。天寶間。調萬年尉。右相李林甫與李適之。張垠。有隙。適之領兵部。而垠兄均爲侍郎。林甫密遣吏。撻其銓史。僞選六十餘人。帝命京兆與御史雜治。

索日情不得使溫佐訊溫分囚廷左右中取二重
囚訊後舍楚械榜掠皆呻呼不勝曰公幸留死請
如牒乃挺出諸史迎懾其酷及引前不訊皆服日
中獄具林甫以爲能溫嘗曰若遇知已南山白額
虎不足縛林甫久當國權焄天下陰構大獄除不
附已者先引溫居門下椎鍛詔獄

崔器希帝旨

唐崔器性陰刻樂禍安祿山陷京師王官多重爲
驅脅二京平器爲三司使令王官陷賊者悉入含

元庭中。露首跣足待鞫。器既殘忍。希帝旨。欲深文。繩下。乃建議。陳希烈。達奚珣等數百人皆抵死。李現執奏。乃以六等定罪。多所原貸。帝曰。朕幾爲器所誤。後病亟。叩頭若謝罪狀。家人問之。曰。達奚尹訴於我。三日死。

若虛希輔國

唐毛若虛。性殘鷙。乾元中。鳳翔七坊士。數剽州縣間殺人。尉謝夷甫。不勝怒。榜殺之。士妻訴李輔國。輔國請御史孫瑩窮治。獄久不具。詔中丞崔伯陽。

與三司參訊未決。乃使若虛按之。虛卽希輔國意。歸罪夷甫。伯陽爭甚力。貶嶺外。於是若虛權焰震朝廷。羣臣不得舒息。

安石違公議

宋登州有不成婚婦謀殺其夫。傷而不死者。知州許遵讞之。當絞。而詔貸之。遵上議。準律。因犯殺傷而自首者。得免所因之罪。婦當減二等。不當絞。詔司馬光與王安石議之。安石是遵議。光言。謀殺猶故殺也。皆一事。若謀爲所因。與殺爲二。則與故殺

可爲一邪。自文彥博以下皆附光議。然卒從安石言。至今天下非之。

王文承風旨

國朝王文爲都御史。承望太監王振風旨。時薛瑄爲大理少卿。有指揮某死。妾有色。振姪王山欲娶之。妻持不可。妾因誣告妻毒殺其夫。都察院問已誣服。大理駁還之。如是者三。文劾瑄得賄。故庇死獄。詔逮至午門會問。瑄呼文字曰。若安能問我。若爲御史長。自當迴避。文怒。奏瑄囚不服。問理。詔拂

於市殺之。門人皆奔走。瑄神色自若。會振有老僕。素謹厚。不預事。是日哭於樹下。振問何爲泣。曰。聞今薛夫子將刑。故泣。振問何以知之。僕曰。鄉人也。備告其賢。振意解。傳詔赦之。繫錦衣衛獄。終不出。殺人以媚人。

王宗載。萬曆八年爲右僉都御史。巡撫江西。時安福御史劉公臺以建言忤宰輔。黜。宗載承望宰輔。欲中臺。危法。瞰臺與鄉人謝曜有隙。密帖吉安府推官陳紳訪報。時紳署安福縣印。卽諷曜誣奏臺。

下所司問宗載即將臺捏擬誑賺人財計贓準竊盜論徒罪引故違指稱內外大小衙門官員名頭并各衙門打點使用名色誑賺財物發邊衛充軍臺父劉震龍奪封擬徒罄臺之家產不足究所誣贓於什一宗載遂於他犯斷追代臺完納臺起解竟死伍所宗載尋改左僉召入京後宰輔死言官論載等殘忍太甚殺人媚人得旨行撫按勘載

等俱伏法遣戍

按江西巡撫曹大林上覆題本載會審得劉臺原招以指官誑騙坐擬

戍邊查謝曜原奏初無打點之說奏內條列過時洗垢吹毛至爲纖悉若果有打點一節原奏豈肯

遺之緣所奏事情罪俱不至邊遣故又於奏外誣捏以成其罪耳據陳紳供稱萬曆八年六月間王都御史發下密帖一箇內稱謝曜前年要奏劉御史果有此事否作速訪報又巡按御史陳世寶密帖內稱安福地方事果否速查報據此則造意授指主使排陷宗載實爲禍首特假手於陳紳借名於謝曜耳冤有正主罪有元謀天地鬼神昭鑒孔赫載雖百口無以自解矣又按宗載原批劉公誣招云劉臺所犯事情既經各官勘明情亦不枉但奏內毆死劉伯潢逼死劉端淑夫婦係干人命重情未經檢究止據親屬供稱病故恐有買和情弊仰按察司再究明實世寶亦批劉臺情罪既經鞫問明實誠爲不枉但查劉伯潢奏稱被臺毆死漫云病亡且未據檢勘該司再一檢究於此可見載等殺臺初心非止擬戍緣劉伯潢之親屬不肯認故不得已而以邊遣殺之耳臺後得復官贈廢時論爲之稱快云

仁獄類編卷之二十一

新安余懋學行之父纂

男 昌祚續輯

甥韓起龍校梓

疑誤 凡一十八則

夫鄰子取疑于竊鉄。鄰父取猜于請築。事固有迹。然而情不然者。况獄情之微曖乎。往牒所載。情本虛也。而証則近實。事本枉也。而迹則涉真。將以爲非也。而公聽竝觀。則疑于是。將以爲是。

也。而市虎蚊雷。又疑于非。是故有行得而邑灾者矣。有魚網而鴻雁者矣。有城殃而池及者矣。有韓禍而趙嫁者矣。諸若此類。豈惟典獄者無由致詳。卽被枉者亦無以自白。豈惟當局者爲之眯目。卽旁觀者亦爲之怵心。苟非假以歲月。持以從容。而徒以疑似之見。致天齊之刑。其不至于枉民命而害良善者。幾希矣。夫五娘之辟。莫須之寃。固千古之所甚恨也。典獄君子。誠能鑒往轍之覆。而不爲衆言之淆。持慎慮之從。而不

輕文罔之比其於折疑之義庶矣乎爰彙疑議

令狐運冤獄

唐令狐運爲東都留守將逐賊出郊其日有劫轉運絹于道者杜亞以運豪家子意其爲之乃令判官穆員及從事張弘靖同鞫其事員與弘靖皆以運職在牙門必不爲盜抗請不案亞不聽而怒斥員等令親事將武金鞫之金筭箠運從者十餘人一人笞死九人不勝掠自誣竟無賊狀亞具以聞請流運于嶺南德宗令侍御史李元素刑部員外

崔從質大理司直盧士瞻覆案運獄既竟明運迹
非行盜以曾捕掠人于家配流歸州武金肆虐作
威教人通款配流建州復歲餘餘杭捕得劫轉運
絹賊郭郃成瞿曇等七人及賊絹詔令杜亞與留
臺同劾之皆首服然終不原運運死于歸州人士
冤之

解囚得挾婦

宋嘉定間有少年曰徐達巧黠而亡賴聞一家將
嫁女借持櫛具去爲女開面卽復謀爲婚筵茶酒

嘉會日。達相事未終。輒不辭而去。約二惡少共竊女。昏時二少壁後墻外。達復入供事。至入更。女獨在室。突入急負之。奔至後垣。開門。授二少。復閉門。人。公出前門而去。乃趨往同挾女去。如飛。女羞怕。不能呼喚。俄而其家失婦。訝惑。一點奴謂家掌茶酒。素亡賴。睥睨新人。殊似有姦態。因兩度不辭而去。可疑也。女父母亦言開面事。二家奴婢咸曰。渠本非伎藝人。直造姦耳。因俱入後巷追之。巷甚末。而無旁岐。二少見勢迫。棄女而逸。達獨持之行。無

計脫去。適道旁有井。遂擠女其中。衆既追及。達就執訊之。不伏。明旦上于縣。始吐實。與往檢覓。果得屍。然而男子也。達亦自怪。逮二少至。對同達舅姑謂事由父母。又逮之。及媒人兩家鄰。交訊皆無可言。官不能決。榜召屍屬。亦終無認者。乃獨繫達。少數拷掠。竟無狀。居歲餘。官方引問達。適開封某縣解至二囚。一男一女。達回首見之。大駭。號叫久。昧女所在。此真是也。鬼邪。官召前問之。始得其實。方女入。背井不死。大呼求救。而追人得達。誼譁擁回。

不聞井中聲也將曙有二男子井傍過卽開封人
同賈于松而歸聞聲趨視因以甲下井肩女乙以
布接出之旣出乙視女忽念甲貲厚因而戕之有
誰知者顧獨得美婦兼其貲非計邪遂下之石甲
斃焉卽所出疑屍也乙問女得故曰若當從我逝
矣我開封富家若幸爲我妾而勿道實于我家人
不然若爲人女婦而逃逸尚可返復女婦乎女懼
從之至乙家甲家來問乙甲耗乙言分手于蘇州
女如乙戒而乙婦極悍毒女百端女絕不能當一

日乙出女謀諸鄰嫗嫗言若故無罪特從誘脇來何苦忍如是因導之奔訴于官於是逮乙與女解來審驗耳令聞之嘆息回牒正乙誅而論達少如法還婦于先夫云

捕寇得妓首

宋寶慶間臨江蕭某赴臨安往來娼武賽賽家經年所有盡喪娼遂拒之蕭不能給其僕反爲娼家使用蕭大困逼遂歸家將家產盡賣復往臨安就蒸餅橋開典舖不復往娼家矣越三年嘗有人持

布衫一領欲典錢五伯者蕭止典三伯其人云上舍在武賽賽家使錢不爭今日却較這二伯錢你帶行人還在武賽賽家你如今却不敢去了蕭感其言追憶前事心不能平夜攜提籠扣武賽賽門其僕啓關知是夕無客入見武賽賽叙間闊武方應聲蕭斷其頭以去僕亦遂逃蕭致其頭器中滿浸以油置卧榻下時提一觀之曰武賽賽你如今却識我了明日莫知踪跡兩廂吏議曰但有張四官人常往娼家乞覓不厭武賽賽亦拗性必其人

殺之。可尋張四官人觀其辭色。縱不是。且將去展限。遂得張解官。付獄推勘。張不勝拷掠。乃誣服焉。稱刀與武賽賽頭棄海中。遂絞于市。年餘有寇入蕭室。蕭驚捕寇。忽巡牌者至。寇已逃矣。巡牌者見牀下器中。乃武賽賽頭也。明日捕蕭鞫之。具得其情。遂伏辜。仍斬兩廂吏以償張命。獄官亦定罪有差。

樊舍首誤殺

宋寶慶間。建寧府樊上舍處太學時。與左藏庫前

文節級妻往來。文罔知也。節級嘗飲酒肆。密聞鄰座有人相語云。此間內藏庫前。文節級妻可觀。樊上舍往來其家三年矣。每節級五日一次上宿。則上舍必宿其家。文聽樊字未明。泯其說。及當直宿。覓人替之。至夜三更時歸家。急拳門。其妻語上舍曰。吾與爾往來三年無知者。夫今歸無所逃矣。遂就牀頭取鬼頭刀授之曰。我與爾俱出。我開門。爾卽殺之。及開門。天黑不辨人。上舍揮刀誤中其妻。遂逃去。文呼報四鄰。鄰曰。適不聞他人聲。且刀從

何來。我等何由知之。置文于獄。遂誣伏。明日赴市。就刑。樊上舍見犯由上寫文節級殺妻事。遂出街。語文節級云。你妻是我殺了。奈何更要你償命邪。卽到官自首。免死罪。編管本州。

鄰婦證僞姦

宋景定間。福建張氏欲嫁女。有里中不檢少年。聞其茶湯擔有玻璃盃。先一夕詐飾爲婦人。隨女伴入。欲盜之。被執。極其拷掠。先有鄰婦每事女沐浴。見女僻處有雙痣相聯。少年平素詢知之。因是赴

官陳云元與女私。前後騙取其物若干。官追女出對。皆無實狀。少年指僻處雙痣爲證。女愧無辭。驗之果然。將擬罪。鄰婦赴官陳告。少年遂伏辜焉。

疑獄多冤死

元延祐初祭酒宋本記工獄有曰。京師小本局木工數百人。置長分領之一工。與其長不睦。不往來者半歲。衆工謂口語非大嫌。釀酒肉強工造長家和解之。暮醉各散去。工婦素淫。與所私者謀戕良人。以其醉于讐家而反也。殺之。倉卒藏屍無所。室

有土塌中空。乃啓塌磚。割屍爲四五始容焉。復磚如故。明日婦往長家哭曰。吾夫昨不歸。必而殺之也。訟諸警巡院。院以長仇也。逮至榜掠不勝。遂自誣。伏婦發喪成服。修佛事哭盡哀。院詰屍處。工長誣曰。棄壕中。責仵作二人索之。壕弗得。刑部御史京尹交促具獄。期十日得屍。不得再期七日。又不得再期五日。期三日俱不得。仵作被笞無已。相謀別殺人以應命。暮至水傍。一翁騎驢渡橋。乃擠墮水中死之。從驢去。旬餘度翁爛不可識。舉以聞院。

召婦審視婦撫而大號曰是矣招覓壕上脫笄珥具棺葬之獄遂成案上未報騎驢翁之族物色翁不得一日有負驢皮道中者宛然其家所畜奪而披視皮血未燥執訴于邑亦以鞫訊慘酷自誣劫翁驢翁拒而殺之屍藏某地求之不見輒更曰某地辭數更卒不見負皮者亦庾死獄中矣歲餘前長奏下縛狴犴衆工隨而譟雖皆憤其冤而不能爲之明工長竟斬之衆工愈哀嘆不置徧訪其事無所得乃聚交鈔伯錠置衢路有得某工死狀者

酬以是物。初工婦每修佛事。則丐者至。求供飯。有一偷兒。亦常從丐往乞。一日偷兒將盜他人家物。時尚蚤。既熟婦門。乃暗中依其垣屋。以待迫鍾時。忽醉者踉蹌入。工婦家甚怒。將婦詈之。拳之。且蹴之。婦不敢出聲。醉者既睡。婦微許燭下曰。緣而殺吾夫。體骸異處。土塌下二歲餘矣。吾夫尚不知腐盡否。今乃又虐我也。嘆息飲泣者久之。偷兒立于墉外。聽記甚悉。明日入局中。號于衆曰。吾已得某工死狀矣。速付我鈔。衆工遙隨偷兒以往。兒佯

被酒入婦舍挑之婦大罵詈。鄰居皆不平將毆之。偷兒遽至土塼拔磚作欲擊之狀。則屍見矣。衆工突入捉婦送官。婦遂吐實。醉者則所私也。官復審壕中死人何從來。件作欵伏。擠騎驢翁墮水。工婦與件作及所私者磔于市。先斷工長死罪。官吏皆廢棄終身。官以庾死者事若再發則官吏又有得罪者數人。遂寢之。宋子曰。工之死當坐婦與所私者二人耳。乃牽連殺四五人。此事變之殷也。木工解仇而被殺。件作逃笞而得死。負驢皮而死于桎。

枯爲偷兒而購重賞。此又轆轤而不可知也。悲夫。
磕傷伏毆死

元吳人高伯厚云。元統間某吏杭東北錄事。一日有部民某甲與某乙鬪毆云。某甲之母勸解被某乙用木棒就腦後一擊仆地而死。適某承該檢驗。腦骨唇齒皆有重傷。某乙招伏繫獄。經二載遇赦。以非謀殺合宥。既得釋放。來致謝。因言與某甲鬪毆時。其母來勸力牽其子之裾。手脫仰跌自磕。其腦昏絕在地。鄰里用剪刀挑母唇齒灌藥不甦。乃

死故腦唇有傷實未嘗持棒擊之也某問何爲招
伏某乙言倉皇之際唯恐箠楚但欲招承償命弗
暇計也鄰里見我已招遂皆不復言矣吁今之鞫
獄者不欲研窮磨究務在廣陳刑具以張施厥威
或有以衷曲告訴者輒復呵喝震怒略不之恤從
而隸吏輩奉承上意拷掠鍛鍊靡所不至其不置
人于冤枉者鮮矣聞伯厚之言寧不知懼乎

掃瓦得金鑊

元木八刺字西瑛西域人一日方與妻對飯妻以

小金鑊刺腐肉將入口。門外有客至。西瑛出肅客。妻不及啖。置器中起去治茶。比回無覓金鑊處。時一小婢在側執作。意其竊取。拷問萬端。終無認詞。竟至墮命。歲餘召匠者整屋。掃瓦甕積垢。忽一物落地有聲。取視之。乃向所失鑊也。與腐骨二塊同墜。原其所以。必是貓來偷肉。故帶而去。婢偶不及見。而舍冤以死。哀哉。

髯客負簪籠

袁州萍鄉民張姓者。娶嶺南周氏女爲妻。周氏歸。

寧張遣其弟候之。至嶺中。妻倦少息。弟先抱孩以歸。久而妻不至。張與其弟同至。息處無有也。復至周宅。亦不見。周同壻張復登嶺尋訪。則婦死于叢林中。且無首矣。周紐其弟赴官。疑弟欲濫之。不從。殺之以滅口。弟遂誣服官。勒都官索頭與刃。都官解頭與刃。卽將弟已處死矣。踰年。張之鄰人遇婦于建康旅邸。相視駭愕。少焉同炊。鄰告以故。婦泣曰。冤哉。彼時坐嶺上。時有一髯客擔箬籠上山。四顧無人。拔刀脇取我衣服與鞋。喚出籠中一婦人。

衣之斷其頭致籠中推其屍于林內令我入籠中
負擔以行到此矣未幾髯客歸二鄰人紐之聞官
卽承準無詞申刑部取旨髯客處死以款司償其
弟命州縣吏各黥籍邑宰郡司理檢覆官皆降罷
二鄰人給元告補充身賞妻歸夫家先都官迫于
官司盜開他人棺取婦人頭申解亦處死

丁四官人事

國朝陝西某氏有婦與小姑春月在園中作鞦韆
戲圃前矮垣外臨官道有美少年走馬牆外駐而

寓目。二女瞥見之。皆興感慕。因問侍婢。識此郎否。婢令人物色之。報云。丁四官人也。此郎固不知。少之自去。明日。鄰嫗來與二女周旋久之。頗言小娘昨見丁四官人乎。女以爲得其情。頰發頰。嫗曰。無庸我諱。此來正爲丁郎耳。郎昨睹芳儀。固深傾注。二女稍問郎踪跡。嫗盛稱其美。嫗見小姑有動意。入其寢。識其戶徑去。入夜。女滅燭不寐。若有所伺。宵深。忽一郎踰墻而入。暗中卽闖女房。女誰何之。小語曰。我丁四官人也。女默然。攜手入就寢。未明。

而逝。初不睹其面也。次夕復至。亦在暗中相處。荏
苒數月。一日女以事適外氏。且久未返。兄嫂遷寢
其室。亦滅燭而寐。郎來見。扃戶毀窻而入。遽登牀。
捫女得駢首。枕上卽取所佩刀。斷雙首而去。詰旦
家人入視見之。不審何故。直以盜聞于官。緝捕無
狀。後至。一上官錄之。因沉思良久。謂翁媼曰。若子
婦故居此室邪。翁媼言故爲女室。斯夕偶雙宿耳。
上官命逮女至。訊之。卽承與丁四官人通。逮丁至。
詞之。愕然無答。女言前事。丁亦惘然曰。是日從墻

外偶駐。雖見鞦韆事。初無謀念。小玩而過。其後事略不知也。顧安得繆妄若此。官猶以爲詐。問識之乎。女言。每來輒在暗中。初不及旦。固不識也。官更沉慮。因逮嫗掠之。嫗乃不能諱。初二女偶語時。嫗伏鄰壁間之。因宛轉以屬其子耳。捕子至。卽具伏。言久與女私甚密。是夕見其閉戶。疑有他也。因襲之。果與男子竝寢。遂戕之耳。不知其非女也。於是各正其辟。

邊其揭捕文

開封屠戶胡某婦素不潔。胡及舅姑日加笞罵。一日出汲不歸。胡訴之官。適安業坊中有婦人屍在。皆井中者。官司召胡認之曰。吾婦一足無小指。此屍足指全。非吾婦也。婦父母素怨胡氏。及索辯而乃抱屍哭曰。此吾女也。久失愛。舅姑是必撻死。置井中以逃罪耳。時暑月不三二日。屍已潰壞。權厓城外。胡氏被獄拷。遂自誣伏。事上刑部。國朝之法。歲遣使審覆諸路刑獄。是歲刑部郎中邊其來開封視成案。卽知冤濫。謂宣慰使安文玉曰。是婦不

死安執不肯改。其乃令人徧閱各城門所揭諸人捕亡文字。內有賈胡逃婢一人。情狀與屍狀正同。蓋迷其所寓。正智井處也。賈胡已他適矣。於是使人訪故瘞屍者。令求原屍所在。以辨真僞。瘞者出曹門。涉河東畔。指一新塚曰。此是也。發之。乃一男子屍。瘞者曰。方埋時。盛夏河水方漲。此輩病涉。棄屍水中矣。辯男子屍。乃以青須總髮。必江淮新虜。訊之果然。安雖心知其寃。以未得逃婦。不肯釋胡氏。會開封故吏徐沼州一僕。于迂效中得胡氏婦。

仁德類編卷之二十一
問之乃出汲而淫奔于人轉售娼家其事乃白

急捕濫冤丐

宣歙間有強盜夜殺一行旅棄屍道上攜其首去將曉一人繼至而踐其血急走避之尋被追捕繫獄半年不決有司欲得首結案乃嚴督里胥遍行搜索會一丐者病卧窖中卽斬以應命囚亦久厭拷掠遂伏誅後半年強盜始敗于儀真獄成驗所斬首乃莖于歙縣界彼里胥之濫殺與平民之枉死皆緣有司急於得首以結案也然則追責贓證

可不審謹乎。

陳青釋濕履

江西臨江王三郎起瞰江樓以居其妻妻凭欄食果偶核投舟中少年之巾少年舉首意婦人挑已及暮行人其家聞無人聲隨復登舟覺濕其履置竈焙乾是夜王三郎歸見其妻殺死血流盈地且集鄰里視血蹤直至舟中遂執少年付司理推問少年不復自明誣伏焉但不見婦人履及刃有獄吏指近江亭牌子似有物視之履與刃也歟成有

吏陳青者疑之。請假歸。早行江上。王之鄰婦問前獄。陳答云。已將舟中少年正刑矣。姬啞然曰。冤哉。正犯者某獄吏也。青密以告司理。鞠獄吏得其情。少年得釋。獄吏處死。

于王二公冤

于忠愍謙王殿學文。臨刑時。以迎立外藩之故。文稱冤。謙但云。親王非有金符不可召。當辨之。時印綬尚寶諸內官聞之。檢閱各王府符俱在。獨無襄王府者。衆皆危疑。不知其故。乃問一退任內官云。

嘗記宣德間老嬖嬖有旨取去但不知何在老宮人某尚在必知其詳遂往問云云是宣廟賓天時老嬖嬖以爲國有長君社稷之福欲詔及襄王取入後以三楊學士議不諧而止符今在後宮喚閣中老嬖嬖張太后也於是啓太后求之果得某處蓋以積塵埋沒寸餘矣此老閹老嫗不存則典守之死于寃者亦有之矣其後英宗悟二人之寃而悔者此也斷大獄者可不慎哉

庖人幾誤死

成化中南郊事竣。徹器後。亡一金甌。有庖人侍其處。咸謂其竊之。何疑。告捕繫獄。拷掠不堪。竟誣伏。索其贓。無以爲對。迫之。謾云。在壇前某地。如其言。覓之不獲。然猶繫之。將斃焉。俄盜以甌係金系繫于市。市人疑之。執于官。乃衛士也。云旣竊之。遽無以藏。遂瘞之壇前。只捱取系耳。官與俱去。發地得之。乃密比庖人指處。相去數寸而已。或前發土微廣。則庖人盡粉矣。訊獄亦誠難哉。

讀書釋羣疑

今之周守邵武有士人劉惟正女嫁龔賦七月生子默父應祥以爲先孕出婦已三載女舅父金指揮子與維正有卻遂誣訟于郡謂女孕出維正維正默應祥皆諸生廩于庠蒙羞無以自解李心亦疑之偶讀石室秘藏中載有七月生子事出以示諸人於是羣疑盡釋女寃得白

冤死荷花兒

萬曆戊寅周皇親家有喪盜乘冗人殺皇親取財去出門故呼曰周皇親被荷花兒殺死矣邏卒入

視果見屍。一僕爲廚役。一婢荷花兒。在傍。明日以聞于法司。言狀如此。荷花兒因受虐刑。備極楚毒。誣服。謂已與某某姦殺主。取財爲逃計。捕某某不得。竟坐罪凌遲。六月行刑。其時荷花兒哀語。劊子曰。兒是冤死。幸相念先死我。而後鬻肉可也。劊子不聽。竟如法。肉盡。兒猶語曰。我必取汝。越三日。是人坐順城門外麪舖。忽大叫曰。荷花兒撻我。七孔血流死。實殺皇親爲市中賣瓜子炒豆。無賴細民。爭腦瓜等十一人。而歸罪婢以緩已捕。故呼語如

此諸賊因叢淫一瞽婦久之爭姦瞽婦不勝其罵語洩腦瓜等皆被繫吐實餘賊凶刃皆得罪死時刑部尚書翁見海及司官皆被劾罷

謀殺潘四獄

潘四文揚者烏程潘仲驂之子也萬曆戊子攜寵婢春桃及一老僕赴南京坐監舟次姑蘇買妾李氏復買僕朱廷陳堂及廷之妻金堂之妻瞿供事同行朱廷者故太倉凌尚書所逐僕也素不良于行途次欲私春桃而不得春桃亦數以目挑之比

抵京則內外扃嚴。益不可得。文揚性刻薄。日食人米一溢。或出外鑰戶。則溢米亦不可得。堂等亦俱有怨言。文揚每夜宿。則金瞿二婢夜輪入直。堂乃與廷謀。屬二婢通計春桃。寘毒菜內。文揚食菜不堪嚼。吐去。乃復謀夜入。廷門隙伺文揚酒酣。令春桃揉腹。春桃以手扶其陰。廷與直宿。瞿自後絞之。頃刻斃。脇李以刃。使不得出聲。廷乃負春桃酣寢樓上。次早。詐言文揚暴疾。遣老僕還取資斧。僕求書。則以煩悶對。老僕既去。堂等卽室內掘地爲塊。

緝文揚屍其中。以土覆之。盡拚其資。顧輿輿諸婦。若往某處遊。踏者鑰戶以行。遂逸去。逾月。居停者見久出不還。聞之。城遣弓兵同往。啓戶驗焉。則穢氣自室中出。時老僕適取資斧還。官遂繫之。令件作發地得屍。老僕見露。指號哭曰。此四官指也。旣件作謬曰。似是一女人。老僕則又曰。必春桃也。蓋文揚雖內寬。然有小犯。輒鞭撻不少貸。故老僕遂疑爲春桃之屍。驗官信之。遂直以爲文揚撻死。春桃挈家遠逸矣。乃繫老僕送刑部獄。移文遠近搜。

捕文揚時文揚季父督河道從兄令溧水官俱遣人緝之無有也乃嚴檄湖州督其父仲驂必獲仲驂曰兒撻殺婢不至死何匿爲疑有變四出人密訪之久之陸平湖長刑部下司覆屍及發棺則又男子軀也而闕數指驗官駭愕具以聞陸公乃檄四司屬往視埋屍故室取其土篩之得數指骨合焉無幾廷等及春桃李氏亦相次緝獲蓋廷等逸後至江渚廷攜春桃堂攜李氏各詐稱監生歷滿回家賃舟各別堂尋以李氏嫁徽商爲妾春桃

則轉賣爲娼矣。廷婦金亦不能過活。且與某人爲婦矣。數人者。或逸金華。或匿松江。或匿某地某地。俱同時而獲。異哉。然非有潘氏之財力。則亦不能設重購以冀諸人之必得也。獄具。乃論春桃。廷堂瞿氏以殺主。金氏以不與謀。得末減。李氏給潘氏子領歸。此事余在銀臺及刑戶部時。凡數次審錄。春桃等俱無異言。且歷歷訴其謀死之狀不少諱。而好事者猶倡爲浮言。謂前檢爲真。後檢爲賄。至爲之語曰。潘都堂錢神廣大。移生作死。陸尚書佛。

法無邊轉女爲男。嗟夫。人之澆訛。一至此哉。南畿俗浮薄。每一獄起。輒倡爲浮言。以搖問官。當事者若不之察。信流言以出入人罪。其不爲文揚之枉死者幾希矣。

仁獄類編卷之二十二

新安余懋學行之父纂

男 昌祚續輯

甥韓起龍校梓

欺弊 凡十三則

蓋世之欺弊者莫獄吏尚矣工掩覆以爲巧襲
譸張以爲幻僞而出之以誠比而示之以拂本
欲有所私也懼其不吾從而故以公事嘗之人
知彼之從吾之公而不知其陰中吾之私也本

欲有所縱也懼其不吾順而故以重比餌之人
知彼之違吾之重而不知其寔入吾之縱也本
欲有所出也而以出計售矣俄而欲入之焉則
又謂出者之計失也而以左道入之人知彼之
從吾之入而不知出入惟吾操縱也本欲有所
難也而以難畫中矣俄而欲易之焉則又謂難
者之術迂也而以易畫投之人知彼之從吾之
易而不知難易惟吾憎喜也鼓雌黃于唇吻之
間操予奪于點畫之內蓋欺以其方卽殺人之

許子產有所不能知况非子產者乎嗟夫情僞
難窮一誠可照彼昏不知者君子固以爲闇而
察見淵魚者君子亦謂之不祥吾無爲其闇又
無爲其不祥則幾乎全爰彙欺弊

莊生論楚赦

陶朱公中子殺人囚于楚朱公遣其長男爲一封
書遺故所善莊生曰至則進千金于莊生所聽其
所爲慎無與爭事長男旣行亦自私齎數百金至
楚莊生家發書進千金如其父言莊生曰可疾去

矣慎無留卽弟出勿問所以然長男旣去不過莊
生而私留以其私齎獻遺楚國用事者莊生間時
入見楚王言某星宿某此則害于楚楚王素信莊
生曰今爲奈何莊生曰獨以德爲可以除之楚王
曰生休矣寡人將行之王乃使使者封三錢之府
楚貴人驚告朱公長男曰王且赦曰何以也曰每
王且赦常封三錢之府昨暮王使使封之朱公長
男以爲赦弟固當出重千金虛棄莊生無所爲也
乃復見莊生莊生驚曰若不去邪長男曰固未也

初爲事弟今議自赦故辭生去莊生知其意欲復
得其金曰若自入室取金長男卽自入室取金持
去獨自歡幸莊生羞爲兒子所賣乃入見楚王曰
臣前言某星事王言欲以修德報之今臣出道路
皆言陶之富人朱公之子殺人囚楚其家多持金
錢賂王左右故王非能爲楚國而赦乃以朱公子
故也楚王大怒曰寡人雖不德耳奈何以朱公之
子而施惠乎令論殺朱公子明日遂下赦令

包拯受吏欺

宋包拯知開封有犯杖脊徒罪者吏受財與之約曰今見尹須使我責狀汝但號呼自辨我當與汝寬罪各受杖決旣而引責囚如吏言分辨不已吏入大聲呼之曰如何只受脊杖出去拯惡吏招權捽吏杖之特寬囚罪從杖公止知以此折吏勢不知乃爲所賣也

張杓中囚計

宋建康溧陽氏民同日殺人皆繫獄獄具以囚上府亦同日就道二囚時相與語監者不虞也夕宿

邸舍甲謂乙曰吾二人事已至此死固其分顧事
適同日計亦有可爲者我有老母貧不能自活君
到府第稱冤悉以誘我我當兼任之等死耳幸而
脫君家素溫爲我養母終其身則吾死爲不徒死
矣乙欣然許之時張定叟杓尚書知府事號稱嚴
明囚旣至皆呼使前問之及乙則曰某實不殺某
人殺之者亦甲也張駭異使覓其說曰甲已殺某
人旣逸出其家不知爲甲所殺也平日與某有隙
遂以聞于官已而甲又殺某人乃就捕某非不自

明官闇而吏欺故冤不得直也張以問甲甲對如
乙言立磔械縱之一縣大驚甲既論死官吏皆坐
失入抵罪而張終不悟

伏氣能不食

宋尚書李南公爲河北提刑時有班行犯罪下獄
按之不服閉口不食者百餘日獄吏不敢拷訊南
公曰吾能立使之食引出問曰吾以一物塞汝鼻
汝能終不食乎其人懼卽食蓋彼善伏氣以物塞
鼻則氣結不通是以自服

尺牘告訐習

宋陳升之知諫院時俗好藏去交親尺牘有訟則轉相告言有司據以推詰升之謂此告訐之習也請禁止之

升之初名旭

閩人食野葛

宋王臻知福州時閩人欲報讐或先食野葛而後鬪卽死遂誣告于官臻問所傷果致命邪吏曰傷不甚也臻以爲疑反訊告者乃得其實

梅妻毀刑具

宋時有王梅者好酒其妻不潔欲圖梅以快所私
梅與族叔錯素讐相絕適鄉人社會梅家各醉散
入夜梅忽死于碎甕間錯聞往視之亟還妻懼錯
或許發謀于所私者遂誣錯挾讐乘梅醉跌殺之
有司逮錯與梅妻訊鞫凡刑加梅妻刑具輒毀加
錯不毀有司疑其妻冤益拷錯不勝遂誣服尋上
官讞獄改錯戍邊每遇雷雨必焚香籲天後梅妻
頸生惡瘡以死所私者亦因別姦被重典蓋妻故
碎甕擠梅于上刃其頸初謀詭稱醉跌觸甕死適

錯往視遂以其讐誣之則易信且滅所忌也刑具則所私賂吏卒夾棍等鐵異新故繩索異麻草堅朽相懸絕用惑有司云夫情僞曖昧其變千狀姦惡不足異也明慎其可忽邪且天人之際亦嚴矣

增畫得陞薦

宋程史載先君之客耿道夫爲余言其姻張氏淳熙間尉廣之增城有黠盜劉花五者聚黨剽掠官司名捕累載弗獲一日有告在鄰邑之境氏家者民素豪枳關環溪畜大獐警吏莫敢闖其藩張欲

躬捕弓級陳某者奮而前曰是危道不煩親行我得三十人饒取之使之往信宿而得鞠其豪侶凡十餘輩散跡所往咸繫而來賊證具以告縣於法應賞矣先是張以他事忤令盜之至今訊爰書以實言府張以非馬前捕不應今將論報張乃知之祈之椽史咸曰案已具府視縣辭而已事且奏不容增府尹適知已又祈之亦弗得自分絕望又一年秩滿置舟如京過韶因謁憲臺坐謁次有它客縱譚一尉事適相類漫告之客曰是不可爲然於

法情理究虐嘗懸購者雖非躬獲亦當免試或循
資盍試請一公移儻可用張方慮關陞薦削不及
格聞之大喜遂白之憲憲命以成案錄爲據付之
至臨安果以初筮無舉員當入殘零張良窘偶思
有此據以示部胥胥視之色動曰伺我一昔得與
同曹議居二日來邀張至酒家劇飲中席謂之曰
君欲改秩乎張錯愕不敢謂然胥曰我不與君劇
君能信我事且立辦詰所以笑不答遂去明日復
至其邸張疑未泮出謀之道夫道夫曰胥好眩詡

志於得錢然亦有能了事者不可信亦不可却盍
爲質而要其成張歸胥又來則曰君不深信我我
請毋持錢去事成乃見歸許諾索緡二千酬酢竟
日以千緡成約張貸其半千道夫同緡識于伯東
周氏兩月不復來顧以爲妄相與深咎輕信徒取
悞日忽夜三鼓有叩門者乃胥焉喜見眉睫曰幸
不辱命文書銜袖取視之則名登于進卷矣張大
駭且質之左銓良是三代爵里皆無譌又扣之省
闈亦然以爲自天而下然終莫測其由也欣然畀

謝貲又厚以饋而問其故胥不肯泄曰君第訖事
何庸知我旣而班見如彝得宰福之宋福去亦自
閤不言惟道夫知之先君爲侍左郎道夫在館因
密訪其事蓋胥初得憲司據見所書功閱皆曰增
城尉司弓級陳某獲若干盜因不告人夜致之家
于每司字增其左畫曰同則如格矣筆勢穠纖無
少異同列不之覺徵案故府胥亦隨而增之但時
矯它曹寅緣之命促其行委曲遮護徒以欲速告
迄不下元處而賞遂行刻木輩舞文顧賄謝乃其

常蓋未有若此者以此知四選蠹積蓋不可勝筭
司衡綜者可不謹哉

臨安我來也

宋趙師霁尹臨安時有點賊每盜人家必以粉書
壁曰我來也嚴捕久不獲而我來也之名喧傳都
邑一日所屬捕至一賊云卽是我來也勘鞫不成
且無賊證其人久淹獄底謂獄卒曰我固嘗爲盜
却非是我來也今亦自知無脫理但乞稍疎刑具
有白
拾藏保叔塔上可往取之卒疑其給已

賊曰無疑但往寺作少緣事托點塔燈盤桓其上
便可覓矣卒始試往果得金大喜入獄以酒肉犒
賊越數日又曰有酒器一甕實侍郎橋下若令家
人以藍盛衣洗橋畔取甕置藍覆以衣可得也卒
又試往所得愈多復以酒肉相犒卒雖喜得財而
未測賊意一夜賊謂卒曰欲暫出四更當復來決
不爾累卒甚難之賊曰我固不負你設負你不來
則我所遺足爲爾失囚配罪之費有餘矣苟不從
後生者無及也卒懼不得已遂縱之去坐以俟之

卷之二十二
一
憂念間聞簷瓦聲賊已躍下卒甚喜復極桎之甫
旦張循王府告云夜被盜府門上書我來也三字
趙尹撫案大驚曰幾誤此獄宜乎勘鞫不成也遂
以犯夜律杖出之獄卒歸其妻曰昨半夜後聞叩
門聲開視之一人以二衣囊擲戶內而去卒驚取
視皆黃白物也乃悟其夜賊盜張府之物以爲賂
耳賊竟逃命而趙尹終莫知其奸也

乳頭煉指術

國朝南京城外僻地有婦人探親獨行一髡遙尾

之至迥寂處迫而調之始以好語不從繼以財賄
又不從繼以威脇拔刃撼之懼而從焉旣復謂婦
我欲看爾雙乳卽推仆篋中踞坐其體取囊間
利刃割取兩乳頭裹藏而去婦痛絕而蘇適兵馬
巡邏過之見婦仰卧道側口不能言但指胸臆間
又指賊去路官知其故亟令追之不遠獲焉乃以
抵罪扣其割乳乃將爲煉指之用蓋剝乳頭之皮
包于指上復以藥粘牢燒之內肉了無與也凡燃
指煉燈刺血之類蓋皆有術而此事亦可備訊鞠

之一知

土官掩飭計

黃玠思明府土官景泰間以功屢陞廣西都指揮
乃謀奪其嫡兄知府黃瑯祖職密遣刺客殺瑯等
一家次日佯爲聞變也者往赴屍所痛哭而又故
爲捕盜狀以自掩飾未久事覺廣西撫按按治之
當死玠計無可免度 上欲易故太子未有其端
於是詣闕上疏言父有天下傳諸子古今通義陛
下紹大統數年于茲而青宮震器猶然未正非所

以崇大本定大計此在遠夷尚且日夜冀儲位早
端而况中國臣民乎願幸留意 上久萌此念憚
公議未發覽珙疏大喜遂命中官持示內閣仍賜
內閣陳循等各金五十兩銀一伯兩以關其口遂
定議易 英廟所立故太子而自立其子爲太子
舉朝陞賞無數尚書王直嘆曰嗟嗟此何等事乃
出西南夷罪繫口其如辱宗廟何珙會赦復職尋
陞都督後 英廟復辟珙仰藥死剖棺鞭屍其子
政等皆伏誅

賊販苦腦子

杜宏字淵之河南臨潁人弘治庚戌進士爲阜城令時北方常有羣盜共謀殺人以誣人求賄謂之販苦腦子又曰打清水網宏廉知其事會有數商人來邑中與人交易而鬪明日其徒一人死逆旅中宏遣坊甲追捕頃之一人至庭牽二駿馬鞍勒皆飾以銀出符以示宏指符中姓名曰張鑑卽我張慶卽今死者吾弟也我張都御史從子鬻醪淮上索逋直來此昨令吾弟出外以黃金易錢與人

圖而死耳宏使人檢其橐有新衣數事詰其餘貲
安在曰吾所挾銀途中遇盜刼去矣宏笑曰爾詐
也銀且被刼安得黃金獨存又餘美衣駿馬邪其
人詞窮色動欲逸宏乃繫其馬封其橐使卒守之
適景州逸他盜邏者獲一人自言我商也有同侶
在阜城與人鬪而死我避官府來此耳州吏移文
至阜城驗之宏得之甚喜乃移景州并逮其人至
嚴刑訊之盜皆具伏曰某實殺人求賄者于某地
殺某于某地又殺某計凡殺九人今死者非吾弟

也乃途中行丐者吾衣食之令飼馬復令其與人
交易而鬪乃殺之耳宏猶恐有遺情復再三訊之
中一人楊傑始吐實曰初與交易者鬪乃傑也非
死者也傑五人于此夜殺飼馬者傑恐鬪者識我
卽逃往景州耳宏乃具白巡撫大臣下屬郡覆盜
所陳往事皆符合遂聞于上內批爲首者凌遲處
死爲從者斬梟首示衆仍著爲令遠近稱快焉

銓曹吏舞文

枝山野記有進士林廷美者閩人儀貌頗偉 上

欲俾近侍問其貫籍林以鄉音對 上嫌之乃擢
爲某部官林退數步復召回曰蠻子也沒福卽改
爲山東某州知州凡二任會有朝旨有司繁劇地
陞一級林時在京師三司以下皆保奏林知州係
繁劇林當準勅時程襄毅公信謂林曰公必與駿
典然亦應稍通人事林曰我何爲爾程曰官不須
爾當承胥輩一語無傷林亦不從一日倚部門吏
出揖曰公某州使君乎林曰然吏曰公在陞格可
賀矣林曰然吏曰某當承效殷勤公少顧之乎林

曰否吏白再三林曰吾有銀五錢爲日費姑以饋爾吏欲十兩林不答去吏明日抱文書曰所司言某州保結恐三司失實與時連坐官曰奈何吏曰當更行下軍衛具保結狀亦可林知之窘矣問之吏吏曰公亦問我乎今欲集事反手耳第予我金然當倍之林予之十金吏曰公高枕旅邸以伺新命候有帖子召公當來越二日果然蓋吏又白公移文往返應得半歲期恐違朝廷一時恩典官曰奈何吏曰今當州有操兵數伯在京或令具一結

狀則事可速白兼獲其事實官曰然吏卽行牒移
軍具狀如式林遂得如格舞文輩入賂市權如此

仁獄類編卷之二十二終